



Title	詩
Author(s)	鈴木, 虎雄
Citation	懷徳. 1930, 8, p. 83-84
Version Type	VoR
URL	https://hdl.handle.net/11094/88817
rights	
Note	

The University of Osaka Institutional Knowledge Archive : OUKA

<https://ir.library.osaka-u.ac.jp/>

The University of Osaka

詩

西遊詩藻

豹軒
鈴木虎雄

喫獨良果詩

獨良形貌奇。無乃鬼胎遺。針戟如荆棘。斑紋似鳳梨。攜來人擁鼻。剖去肉凝脂。停舌尋真味。誰言逐臭兒。

南溟月下懷友

一碧滄溟萬里連。玲瓏月色浩無邊。思君今夜知何處。南斗闌干北斗前。

錫蘭佛牙寺

壞壁丹青舊道場。菩提樹大綠蒼々。崑奴不解人間改。漫學胡言說法王。

航歐船中釋杜詩書感

杜老生涯旅苦中。卜居錦水復西東。船窓釋到巴閬卷。客淚數行下夜風。

喫莽瓜作

皮成春草碧。肉帶松脂香。可比談玄味。和吾舌本強。

西丁灣外望亞佛利加洲作

長天積水渺無窮。船駕洪濤去向東。莽々亞洲青欲盡。殘山一角夕陽紅。

地中海上逢中元

長空愁見日車翻。天末浮雲唯一痕。故國何人能憶我。地中海上作中元。

埃及改羅府郊行

黃流滾々乃河斜。綠野天開禾接瓜。一路閒行希撒郭。合歡花映木綿花。

入英京作

樓船日々逐鵬程。惡熱狂濤魂幾驚。一夜砧聲人萬里。滿天明月入龍城。

西獨途上作

邱陵起伏盡平原。處々塔尖楊柳村。水細草肥牛步健。秋風未老牧人門。

巴里薛延河橋上作

薛水兩涯林盡黃。曉來煙雨見微陽。傍人謬作思詩客。獨立橋頭遙憶鄉。

瑞西山中作

溪上山坡碧草濃。懸崖織錦瀑淙淙。誰知秋景兼冬景。落日半天望雪峯。

偶感

往來二萬八千程。歷國十三經眼明。借問盛衰緣底事。唯從勤惰兩途生。

致仕書感

三輪時雄

一

池塘春夢接秋桐。日月愆々駒隙同。回首何將報天子。七年事業始無功。

余爲大阪工廠長實七年